



Na osnovu člana 22, Statuta Brčko distrikta Bosne i Hercegovine («Službeni glasnik Brčko distrikta BiH», broj: 3/07), člana 45. Poslovnika Skupštine Brčko distrikta BiH – prečišćeni tekst („Službeni glasnik Brčko distrikta BiH“ broj 11/03) a na prijedlog gradonačelnika Brčko distrikta BiH broj: 01.1-05-006051/08-1 od 13. marta 2008. godine, Skupština Brčko distrikta Bosne i Hercegovine na 65. redovnoj sjednici održanoj 19. marta 2008. godine, u s v a j a

ODLUKU O ZAŠTITI CIVILNIH ŽRTAVA RATA

I. - OPĆE ODREDBE

Član 1. (Predmet)

Ovom odlukom utvrđuju se status i prava civilnih žrtava rata, i propisuje postupak za ostvarivanje prava civilnih žrtava rata pred nadležnim organom Brčko Distrikta BiH (u daljnjem tekstu: «Distrikt»).

Član 2. (Status civilne žrtve rata)

Civilnom žrtvom rata smatra se:

- a) lice kod kojeg je nastupilo trajno psihičko oštećenje, usljed zlostavljanja, silovanja, prinudnog rada, boravka u zatvoru, logoru ili zbijegu i slično;
- b) lice kod kojeg je nastupilo oštećenje organizma usljed ranjavanja ili povreda nastalih u vezi s ratnim operacijama kao što su: bombardovanje, zalutali metak, minobacačka i topovska granata i slično;
- c) lice kod kojeg je nastupilo oštećenje organizma usljed ranjavanja ili povreda nastalih od zaostalih vojnih materijala;
- d) lice kod kojeg je došlo do naknadnog oštećenja organizma zbog ispoljene i pogoršane bolesti, dugog perioda inkubacije, gubitka ekstremiteta i vida oba oka, mentalnog oštećenja i drugih oštećenja organizma nastalih pod okolnostima iz tačke a), b) i c);
- e) lice koje je ubijeno, poginulo, umrlo ili nestalo pod okolnostima navedenim u tačkama a), b) i c).

II. - VRSTE PRAVA I USLOVI ZA NJIHOVO OSTVARIVANJE

Član 3. (Vrste prava)

- (1) Prava kojim se ostvaruje zaštita civilne žrtve rata su:
 - a) civilna, odnosno porodična invalidnina;
 - b) dodatak na njegu i pomoć drugog lica;
 - c) zdravstvena zaštita;
 - d) ortopedski dodatak.

(2) Prava navedena u stavu 1. ovog člana finansiraju se iz budžeta Distrikta.

Član 4.

(Lica koja imaju pravo na zaštitu)

(1) Prava utvrđena ovom odlukom može ostvariti lice sa statusom civilne žrtve rata koje ima prebivalište na području Brčko Distrikta BiH (u daljnjem tekstu: Distrikt), a koje je oštećenja organizma zadobilo poslije 17.08.1990. godine, kao i civilna žrtva iz Drugog svjetskog rata.

(2) Lice sa stalnim prebivalištem u Distriktu, koje ostvaruje pravo na zaštitu kao civilna žrtva rata u skladu sa propisima Federacije BiH ili Republike Srpske, po osnovu ranijeg mjesta privremenog boravišta, ne može ista prava ostvarivati u Distriktu.

Član 5.

(Civilna invalidnina)

(1) Civilna invalidnina je novčano primanje zbog djelimične ili potpune nesposobnosti za rad na koje ima pravo civilna žrtva rata kod koje je nastupilo oštećenje organizma od 60% do 100%.

(2) Mjesečni iznos civilne invalidnine utvrđuje se rješenjem.

(3) Civilna invalidnina određuje se prema stepenu oštećenja organizma u procentu od prosječne neto plate ostvarene u Distriktu u mjesecu koji je prethodio datumu izdavanja rješenja, i to:

- a) I grupa, 100% oštećenje organizma za lice kojem je za osnovne životne potrebe neophodna njega i pomoć drugog lica, iznos od 90% prosječne mjesečne plate;
- b) II grupa, 100% oštećenje organizma, iznos od 70% prosječne mjesečne plate;
- c) III grupa, 90% oštećenje organizma, iznos od 50% prosječne mjesečne plate;
- d) IV grupa, 80% oštećenje organizma, iznos od 40% prosječne mjesečne plate;
- e) V grupa, 70% oštećenje organizma, iznos od 35% prosječne mjesečne plate;
- f) VI grupa, 60% oštećenje organizma, iznos od 30% prosječne mjesečne plate.

(4) Usklađivanje mjesečnog iznosa invalidnine sa prosječnom neto platom u Distriktu vrši se svakih 6 (šest) mjeseci.

(5) Stepenu oštećenja organizma dokazuje se nalazom i mišljenjem nadležne ljekarske komisije.

(6) Nadležnom ljekarskom komisijom smatra se:

- a) ljekarska komisija koja je nakon 17.08.1990. godine po važećim propisima SR BiH, Republike Srpske i Federacije BiH nadležna za utvrđivanje stepena invalidnosti vojnih ili civilnih lica;
- b) ljekarska komisija koju imenuje gradonačelnik na prijedlog nadležnog organa javne uprave Brčko Distrikta BiH.

Član 6.

(Porodična invalidnina)

(1) Porodična invalidnina je novčano primanje zbog gubitka člana porodice-civilne žrtve rata i ostvaruje se u visini od 20% od iznosa civilne invalidnine I grupe.

(2) Pravo na porodičnu invalidninu mogu ostvariti članovi porodice civilne žrtve rata:

- a) bračni partner koji nije zasnovao drugi brak;
- b) djeca rođena u braku ili van njega, usvojena djeca ili pastorčad, za vrijeme školovanja, a najduže do navršene 27. godine života;
- c) roditelji ili usvojitelji;
- d) očuh ili maćeha, ukoliko civilna žrtva rata nema žive roditelje.

Član 7.

(Dodatak na njegu i pomoć drugog lica)

(1) Pravo na dodatak za njegu i pomoć drugog lica ima civilna žrtva rata I grupe iz člana 5. stav (3) tačka a) ove odluke, pod uslovom da to pravo nije ostvarilo po nekom drugom osnovu.

(2) Dodatak na njegu i pomoć drugog lica određuje se mjesečno u iznosu od 80% od iznosa civilne invalidnine I grupe.

Član 8.

(Pravo na zdravstvenu zaštitu)

Pravo na zdravstvenu zaštitu obezbjeđuje se civilnoj žrtvi rata i članovima porodice civilne žrtve rata, koji to pravo ne mogu ostvariti po nekom drugom osnovu.

Član 9.

(Ortopedski dodatak)

Pravo na ortopedski dodatak ima civilna žrtva rata u mjesečnom iznosu u visini od 70% iznosa ortopedskog dodatka za ratne vojne invalide, analogno vrsti i stepenu invalidnosti ratnih vojnih invalida.

Član 10.

(Ostala prava)

(1) Pored osnovnih prava navedenih u članu 3. ove odluke, civilne žrtve rata imaju pravo i na:

- a) pomoć u troškovima liječenja i nabavci ortopedskih pomagala,
- b) osposobljavanje za rad (profesionalna rehabilitacija, prekvalifikacija i dokvalifikacija),
- c) posebne projekte zapošljavanja,
- d) prioritetno stambeno zbrinjavanje,
- e) psihološku i pravnu pomoć.

(2) Prava iz stava 1. ove odluke ostvaruju se u skladu sa propisima iz oblasti zdravstvenog osiguranja, zdravstvene zaštite, zaštite porodice s djecom i zapošljavanja.

III. - POSTUPAK ZA OSTVARIVANJE PRAVA

Član 11.

(Nadležni organ)

Po zahtjevu za ostvarivanje prava na zaštitu civilnih žrtava rata, rješava u prvom stepenu organ javne uprave Distrikta u čijoj je nadležnosti oblast socijalne zaštite (u daljnjem tekstu: „nadležni organ“).

Član 12.

(Podnošenje zahtjeva)

(1) Lice koje ispunjava uslove za ostvarivanje prava navedenih u članu 3. ove odluke, podnosi nadležnom organu zahtjev za registrovanje statusa civilne žrtve rata, odnosno člana porodice ubijene, poginule, umrle ili nestale osobe - civilne žrtve rata, i ostvarivanje prava po tom osnovu.

(2) Zahtjev za registraciju se podnosi počev od dana stupanja na snagu ove odluke pa do 30.06.2008. godine.

(3) Ukoliko lice iz stava (1) ovog člana iz objektivnih razloga (bolest, boravak van zemlje, izdržavanje zatvorske kazne, naknadno nastupilo oštećenje organizma) nije u mogućnosti podnijeti zahtjev za registraciju u roku iz stava (2) ovog člana, može podnijeti zahtjev u roku od tri mjeseca nakon prestanka tih razloga.

Član 13.

(Ostala dokumentacija)

(1) Uz zahtjev za priznavanje statusa civilne žrtve rata podnosilac zahtjeva podnosi nalaz i mišljenje ljekarske komisije iz člana 5. stav 6. ove odluke, ili drugu medicinsku dokumentaciju o liječenju izdatu neposredno nakon nastanka oštećenja organizma.

(2) Za priznavanje statusa člana porodice ubijene, poginule, umrle ili nestale osobe- civilne žrtve rata, uz zahtjev se prilažu pisana dokazna sredstva izdata od strane nadležnih institucija, uključujući udruženja građana, nevladine organizacije i druge organizacije koje se bave traženjem nestalih osoba, odnosno evidencijom ubijenih, umrlih i poginulih lica u toku rata.

(3) Nadležni organ sam pribavlja ostalu dokumentaciju koju vode organi javne uprave Distrikta po službenoj dužnosti, a kojima se dokazuju činjenice ili stanje od važnosti za utvrđivanje statusa civilne žrtve rata, odnosno ostvarivanje prava po tom osnovu.

Član 14.
(Donošenje rješenja)

(1) Na zahtjev lica iz člana 12. stav (1) ove odluke nadležni organ donosi rješenje u roku od 30 dana od dana prijema zahtjeva.

(2) Protiv rješenja iz stava (1) ovog člana ovlašteno lice može podnijeti žalbu Apelacionoj komisiji u roku od 15 dana od dana prijema rješenja.

Član 15.
(Revizija rješenja)

(1) Rješenja donesena u prvom stepenu kojim je priznato pravo na osnovu ove odluke, podliježu reviziji.

(2) Reviziju rješenja svakih 6 (šest) mjeseci vrši posebna komisija koju imenuje rukovodilac nadležnog organa.

Član 16.
(Početak ostvarivanja prava)

Prava utvrđena rješenjem počinju se ostvarivati narednog mjeseca od datuma isteka roka za registraciju utvrđenog u članu 12. stav (2) ove odluke, odnosno naredni mjesec od datuma izdavanja rješenja, ukoliko je registracija obavljena nakon isteka roka iz člana 12. stav (3) ove odluke.

Član 17.
(Prijava promjene)

Civilna žrtva rata i član porodice civilne žrtve rata, koji su ostvarili pravo u skladu sa ovom odlukom, dužni su da prijave svaku promjenu koja je od uticaja na stečeno pravo, u roku od 15 dana od dana nastanka promjene.

Član 18.
(Prestanak prava)

Prava ostvarena u skladu sa ovom odlukom prestaju:

- a) smrću civilne žrtve rata, odnosno člana porodice iz člana 6. stav (2) ove odluke, prvog narednog mjeseca od dana nastupanja smrti,
- b) ostvarivanjem istog prava po nekom drugom osnovu, danom ostvarivanja prava ili danom saznanja za isto,
- c) danom poništenja rješenja u postupku revizije.

IV. - ZAVRŠNE ODREDBE

Član 19.
(Ljekarska komisija Distrikta)

U smislu člana 12. stava 1. ove odluke priznaje se nalaz i mišljenje ljebarske komisije za utvrđivanje prava u prvom stepenu po Zakonu o pravima boraca i članova njihovih porodica imenovane od strane gradonačelnika Brčko Distrikta BiH.

Član 20.

(Stavljanje van snage)

Danom stupanja na snagu ove odluke stavlja se van snage Odluka o zaštiti civilnih žrtava rata, broj: 0-02-022-40/00 od 11. i 18. jula 2000. godine.

Član 21.

(Stupanje na snagu)

Ova odluka stupa na snagu osmog dana od dana objavljivanja u «Službenom glasniku Brčko Distrikta BiH».

Broj: 0-02-022-43/08

Brčko, 19. mart 2008. godine

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić, s.r.